

國朝詩人徵略二編

國朝詩人徵略二編卷五十九

番禺張維屏子樹輯

譚敬昭

字子晉一字康侯廣東陽春人嘉慶二十二年進士官戶部主事有聽雲樓詩集

君年十二受知於學使平公恕補弟子員粵東督學如曹公仁虎戴文端公衢亨姚文僖公文田君皆受知先後郡試凡十四冠軍

聽松廬文鈔

君博學工文辭尤肆力於詩其爲詩也溯沿風騷沉寢樂府瀏然以清穆然以古取法於漢魏六朝

唐宋而兼掇其英華嗣響於嶺南諸大家而自闢

其堂宇

聽松廬  
文鈔

君爲部曹十餘年罕與上官接談公餘退食輒手

一卷蕭然自得於人世浮榮泊如也

聽松廬  
文鈔

馮魚山先生稱康侯樂府獨出冠時

玉壺山  
房詩話

康侯詩出入古大家於太白尤近

粵東七  
子詩鈔

康侯嘗賦珠江柳枝詞九十首手寫刻之

茶村  
詩話

深閨洞房語恩怨紫燕黃鸝韻桃李

黃山  
谷句

鶯閨燕

閣年三五馬邑龍堆路十千

楊升  
庵句

百念千嬌春可

惜南樓北斗夜何其

譚康  
侯句

句法皆本老杜

聽松廬  
詩話

康侯定情謠有云願將千萬絲織上雲錦機裁君  
身上衣自得長相依與君一身爲一心輾轉左右  
隨君施此二句忠臣事君貞女事夫兩種心事皆  
在內却借裁衣說出知此可以讀風讀騷

聽松廬詩話

康侯銅柱五律云飛將下天來橫戈瘴霧開南交  
見銅柱東漢失雲臺裏革平生志攀鱗不世才如  
何傷蕙苴千載使人哀此詩可稱太白氣息老杜  
骨頭非工夫氣候到此地步者不能爲也

聽松廬詩話

標題

論詩

楊椒山祠

五古

效西涯樂府

長短句

洗夫人歌

大風歌

制府來

荅彭春

洲見寄

七古

讀曲歌二十首

長短句

摘句

太和滿天地萬物皆春聲

文人如春蠶出絲以自縛

竟夕如人語風聲在柳條

露重月無影風高雲有聲

過眼春歸梅子雨傷心人立柳花風

好夢未成霞散綺驚魂不定雨淋鈴

落花

夾城雲氣連山色萬樹秋聲入海濤

鎮海樓

得知今夕是何夕牛女渡河人隔河

七夕

明月滿江弦管動二弦哀怨過三弦

珠江

倪濟遠

字孟杭號秋槎廣東南海人嘉慶二十二年進士  
官北流賀縣恭城縣知縣有味辛堂詩存

秋槎性兀傲放誕不羈簿書迷悶殆非所堪以故

十餘年不晉一階

楚庭耆舊  
遺詩後集

秋槎以名解元聯捷倜儻不羣作吏與上官齟齬

故詩多嗾殺之音然擺脫凡近綽有可傳

茶村  
詩話

秋槎壯年登第三任縣官雖非顯達亦非奇窮乃

其爲詩於聲爲秋於味爲苦然運思必深造語必

警肥濃甜熟中見此自覺警心動目也

聽松廬  
詩話

標題

送與樵歸廣州

五古

朱將軍墓

讀陳龍

川集

瘦歎

茶江遇風瀕危作

七古

摘句

小隊弓刀狼總健  
大癸風雨虎偃哀

銷魂天亦惟傷別  
望遠人禁更感秋

離別慣經身漸老  
山川原好福難銷

幾見勲名關著作  
最難卿相換神仙

號署散人同魯望  
書宜傲吏志齊諧

布被寵如當夕妾  
秋山寒似讀書官

句不驚人詩懶作  
事難如願氣先平

鄉關已近歸無計  
妻妾同居累倍增

馮賡颺

字子臯號拙園廣東南海人嘉慶二十二年進士  
官翰林院庶吉士山東汶上縣知縣有拙園草

君爲司馬公亮曾孫孝廉元之孫舊宅在城南濠

畔余外祖耿湘門先生

國藩

亦於濠畔築素舫齋

一時杭堇浦

世駿

何西池

夢瑤

陳祝三

華封

獨

諸先生春秋佳日咸相過從司馬開白蘭堂詩社  
與素舫齋簪裾壇坫輝映仙城至今耆老猶能稱  
道之君弱冠有志經學嘗苦儀禮難記手自鈔之  
且鈔且讀會應童子試題爲侍食於君君祭先飯



君熟儀禮一揮而就學使者胡公

長齡

賞其文遂

入泮嘉慶丙子舉於鄉丁丑成進士選庶吉士己卯散館改知縣選山東黃縣蒞任未久調汶上未久緣事落職君於濟南城外購荒園一所日與二三朋舊觴詠其中數年以病卒君秉性剛毅直情徑行其居官也護良善如赤子嫉奸匪如寇讐汶上有訟棍某慣行唆訟君廉得其實拘之某恃無證據出言頂撞君怒杖之越日斃其家屬以濫刑斃命上控大府以無證據而斃人命遂撤君任去任之日百姓相告語謂邑侯欲去莠反去官耶相

約走訴於上畱君以格於成例不果論者謂君果  
敢有爲而中道摧折相與歎惜之君詩文不自收  
拾歿後君弟子良大令搜輯遺稿刻之君子二人  
玉衡候選知州玉滋江西某縣典史

聽松廬  
文鈔

子臯太史余妹壻也未冠卽從余受業自應童子  
試以至成進士入翰林皆從余之日爲多嘉慶庚  
辰余下第歸至江西適子臯挈眷赴山東途中相  
遇談至夜分此後不復相見越數年聞吾妹卒於  
黃縣又數年聞子臯卒於濟南又數年子良官江  
西刻其遺詩寄余展卷披吟感念疇昔停雲落月

爲之愴然

松軒隨筆

摘句 俗學守殘缺泥古徒牽拘周監於二代何

嘗慕黃虞

諸葛天下才偏安王業終成敗固由天吾

道在鞠躬

聳身鳳凰巔一笑驚市閭覽盡萬家月曠

然舒心顏錢塘夜半潮金波湧如山蓬萊

海門東指點蒼茫間便作廣寒遊那復殊

仙凡

杭州客舍中秋夜登鳳凰山望錢塘江此詩頗近太白聽松廬詩話

占鏡膽肝容我照洪鐘大小待誰鳴

懷南山師

邱毓章

字憲周號雲衢廣東番禺人嘉慶六年舉人官大埔縣教諭有學詩草茶陽草閒居草

君弱冠補諸生卽殫心經術尤研究易理辛酉鄉試闈文借易義發揮爲主司所賞舉於鄉三上公車不第丁丑大挑二等選授大埔縣教諭在任四載恆以敦品勵學訓生徒縣有劣生誘姦鄰婦爲本夫控告生饋千金求緩其事君嚴拒之卽詳學院革生衣頂其後生賄息訟事復饋金求開復君又嚴拒之生平遇事持正類如此君事親孝因母

厚言人得道三卷之二  
老不獲迎養思親念切遂引疾旋里就近硯耕每  
日必還家定省道光乙未吏部截取知縣君辭縣  
令請就京銜奉

旨授大理寺評事先是常方伯祿聞君名延課其子是

時粵東當店減利之期未得畫一莠民持械登門  
恃強勤減或至釀成巨案君言於方伯以十月朔  
爲始除夕爲止方伯以爲然申於大府奏請立案  
自是窮民得早日減利君與有力焉道光丙申五  
月以微疾卒年六十有九子三人其季曰應琛能

讀父書

松心  
文鈔

摘句

留侯布奇策欲令太子安爰令四老儒貌  
爲綺里班漢高豈不知默會方寸間亦藉

謝所愛謂彼成羽翰

詠史

四皓事前人已有此論此數句實能寫  
出漢高留侯心事

聽松廬詩話

天欲啓詩聖不使遭時樂往來干戈際每

飯懷忠慤豈惟句驚人詩卽史之約字字

皆血誠性也兼諸學

讀杜工部詩集題後  
詩數百字節錄之

寄跡水晶域秉心朱提銀象異指南針形

如倒垂綸外畫辨分寸中條判厓垠驗暑

見進上占寒觀退屯

寒暑針

三隅已缺留一隅尙記永嘉年號字

晉輒

此甌與沙灣古松皆可爲陳將軍考證

將軍名元德蓋晉臣不肯仕宋者

松軒隨筆

四圍環白浪一柱聳中流

金山

四山圍馬耳一水貫羊腸

埔陽

畫有客求隨意寫書無錢買用心鈔

自遣

無人問字何妨懶有夢隨風亦到家

偶成

詩書未賣留兒讀菽水能供賴婦賢

將歸

留得一杯南漢土美人魂魄亦英雄

素馨田

柴門晝靜無人到花自吹香水自流

江村

國朝詩人徵略二編卷六十一

番禺張維屏子樹韓

石家紹

字瑤辰一字民傭山西翼城人道光二年進士官

江西銅鼓營同知

君少孤太夫人撫育之弱冠補博士弟子員嘉慶  
癸酉拔貢生選壺關縣教諭實心課士學使者稱  
爲真教官己卯舉於鄉道光壬午成進士以知縣  
用分發江西署大庾縣事補龍南縣調署新城調  
補上饒署新建調補南昌以循卓特薦升銅鼓營



國朝言行錄卷之二  
同知丙申上計入都

召見

上垂詢地方情形君敬謹奏對回任丁酉權守饒州戊戌權守贛州己亥五月以公事赴雩都途次受暑返贛庸醫誤投溫劑遂卒聞者無論識與不識皆歎惜之君所歷五縣合詞請祀名宦南昌士民尤感戴特爲建專祠焉君平日居官行政治於民心孚於輿論可想見矣君在龍南人傳其發奸摘伏一二事境內稱爲神明在南昌連年水患饑民聞省會散賑聚沙井者數萬上官委君同新建令張

君湄辦理賑務始而散米令饑民自爨繼而來者  
愈衆沿河一帶幾莫能容且恐人衆滋事於是散  
錢諭令得錢各返鄉里候截畱漕米分給各鄉計  
兩旬之久數萬饑民以漸散去君之心力旣瘁而  
南昌水患未已君復請於上官開倉平糶而無力  
糴米者則又分廠煮粥以賑之饑民提籃托鉢擁  
擠喧呶甚或紛爭鬪毆望見君至卽羣相戒曰石  
爺來矣我輩無得多事此非平日素行足以感人  
其能若是乎首縣政務繁劇君處之裕如理辭訟  
必細心研鞫夜分不倦生平無他嗜好惟好聚書

藏書至七萬卷每行役必以書自隨暇卽手一卷  
君事母孝恆欲得其歡心事上官以敬然是非可  
否惟義是視不肯阿意曲從待僚友以誠有以事  
干者非義則拒之其合於義者則爲之籌畫俾克  
有濟其宅心之厚又如此君歿一子尙幼所藏書  
盡以抵私債聞者傷之珠海老漁曰余五十年來  
交海內賢士大夫心藏心寫不一其人求所謂順  
乎親信乎友獲乎上治乎民兼而有之者不易觀  
也如石瑤辰庶幾當此而無愧乎其爲人宜壽乃  
年方強仕中道摧折悲夫悲夫然千萬人同心同

力報以俎豆馨香此又可以見秉彝之良直道之

公出於斯民者爲不可泯也

聽松廬  
文鈔

石瑤辰爲南昌令公餘輒邀余與沈蘋濱明經毓

蘇

張春槎司馬湄論文談藝每至宵深渾忘首縣

衙齋依舊書生風味

松軒  
隨筆

摘句 有職殊難稱無功莫妄邀

正望甘霖沾大野轉愁明月照窮民

望雨

同考諸公如大吏當官獨我似勞民

秋闈  
供給

千古文章標勝地滿城風雨擁高樓

宴勝  
王閣

令下三軍烏鵲靜兵排八陣虎貔多

陪侍  
閱兵

戴蘭芬

字 號湘浦安徽盱眙人道光二年

賜進士第一人官翰林院修撰

湘浦性質溫醇詞華朗潤疊奉

恩命典試督學中年凋謝士論惜之

聽松廬詩話

標題 鳳陽節婦行

樂府

書周芸皋襄鹽歎詩後

七古

摘句 拍天江勢連三楚到眼山光畫六朝

金陵

秀才家世

天顏喜

壬午召見上問有聞汝十四

世皆是秀才之語海嶠人文理學多

閩闈卽事

六朝山色供詩料千里江聲入酒杯

文鴻

字賓叔江西萍鄉人道光五年舉人官知縣有味  
澹軒詩草

賓叔由廩生中式乙酉科舉人考取 景山教習  
大挑一等分發東河試用知縣河帥栗樸園先生  
深器之兩權泉河通判借補濟州州判丁內艱起  
復再補陳留縣丞因勞成疾乞假南還丙午五月  
卒於龍游舟次年五十四其子運清護喪歸葬賓  
叔質地過人行誼甚篤平日講求經政兼習韜略  
歲壬辰臺賊張丙陳辦等作亂次年聞仲兄煊在

笨港被圍亟欲赴其難旋接平寇音信仲兄以軍  
功陞知縣乃止不行復函以詩代柬爲善後計辛  
丑粵東有夷患寓書陳戰守三策并請自効當事  
未之許也嗣是沉困末僚齋志以沒惜哉幼耽吟  
咏初學選體繼乃涉歷唐宋明諸大家集於近代  
喜六家及蔣心畬張船山詩游粵時見張南山詩  
集亟購歸誦之所著有味澹軒詩草十六卷試律  
五卷初刻十之三四以存其大略耳

實叔事略  
兄晟撰

賓叔遊粵偶見聽松廬詩鈔亟購歸誦之歎爲必  
傳余未之知也後十餘年令兄叔來刺史乃述之

感氣味之同岑撫琴絃而歎逝手披遺集慨念知

音因摘佳篇雋句刻入詩人徵略

松軒逸筆

賓叔詩諸體皆工五言古尤爲老健且語多名理

摘尤愛者錄之譬諸嘗鼎一臠足知嘉味

聽松廬詩話

標題 擬古詩十九首 倣左太冲詠史八首

齋居雜感六十首

錄十四首

以上五古

女參將行

明總兵李漆妻

萍鄉水災紀聞

以上七古

摘句 覲面不得語不如參與商

百里老賤媵乃爲秦良弼子胥窮丐夫卒

能霸吳國范睢折辱餘雄圖逞蠶食孫臏



億矣甚馬陵終奏績四子俱偉人勲業光  
史冊當其處艱危幾莫保朝夕千古歎才  
通半生悲遇塞

後人攻前人頗不遺餘力攻人人攻之相  
攻無終極自非大聖言有得卽有失字句  
苟求疵六經可指摘時手無大謬駁斥究  
何必古籍久流傳議論毋過刻先儒縱推  
倒名豈爭能得

須知絕世文善翻古人案推陳乃出新祇  
爭一轉換

能文不解事讀書徒等身蔑古與泥古兩  
人如一人卽如井田法將何以給民又如  
車戰法亦罕用行軍此類頗甚衆一一難  
具陳所貴師其意儒生自有真

擇地久不葬形家言是從閒考形家言萬  
口同不同上古無葬具若帝若王公中古  
無葬法國與家隆隆郭璞造葬經乃速戾  
當躬溫公疾其書欲假秦火攻奈何孝子  
心墮彼術士中

惑風水而久停親櫬者請誦此詩

嗟哉百年身毋爲口體誤

言聖不離庸言天求其故乃務新與奇誤  
人適自誤

履成非一木裘成非一腋私心漫自矜集  
思庶廣益濟濟和羣賢雍雍熙庶績同舟  
期共濟何況家與國

載舟卽覆舟險莫險於水生人卽殺人醫

藥亦猶是

醫藥生人不敵殺人之  
多奈何

松軒隨筆

歲月雖云長黃童忽白叟眼前良可惜不

惜恆八九

少壯不知惜惜身已  
老奈何

松軒隨筆

賓叔詠古五律有通首警鍊者錄之

隆中君就見伊呂事齊觀學貫天人貴才兼將相  
難三分扶正統六出恥偏安古柏長留蔭神明護

錦官

諸葛武侯

作鑑常陳錄懷忠屢犯顏文詞匡主德風度壓朝  
班他日憂林甫當時料祿山曲江論相業宋璟魏

徵間

張曲江

義烈壯軍聲睢陽尚有城孤危四百戰饑餓一千  
兵力爲江淮盡功教李郭成効忠偕許遠同死本

同生

張睢陽

一代勳臣冠千秋福將推生平仗忠信天下倚安  
危望重曾皆服功高主不疑臨淮終晚節媲美亦

宜之郭令公

徽欽去不返謀國歎無人更立山河主能安社稷

臣故君還復辟少保竟亡身他日從昭雪猶聞泣

鬼神于忠肅

一夜落花雨萬家行路人都中下第送人

飲泉猿挂樹覓路鳥衝花武功山

遠山推日落高鳥挾雲歸曹州道中

書爲來生讀琴猶古調彈任城寓居

弟兄况復稱知己筆硯曾經共少年

送叔來兄

之官  
粵東

三分割據周郎劍一局偏安謝傅碁

金陵懷古

國士但堪爲大將功臣不合作眞王

韓淮陰侯

獄成三字莫須有鐵鑄四凶何可無

岳王墳

張許功名原與共夷齊心事總相關

文謝二公

燕市去爲嵇紹血厓門來挾伍胥潮

先信國公

文字韓歐詩李杜諫爭龍比節夷齊

先信國集

華嶽三峰天外落黃河萬里斗邊來

過潼關

讀古文知吾學淺生今世歎著書難

書懷

鮑俊

字宗垣號逸卿廣東香山人道光三年進士官翰林院庶吉士刑部主事卽用郎中有榕塘詩鈔逸卿太史以工書名於時道光癸未成進士

殿試卷在進呈十本之內其工小楷如此而大小行草以及擘窠大字靡弗工故遠近求書者踵相接君詩工詞工畫工制藝尤工然非徒諸藝之工也君天性孝友封翁喜看山君屬畫師多繪策杖觀山圖請諸名人題詠欲尊甫精神意象流傳於詩辭翰墨間禮曰思其所嗜又曰貽親令名此孝子之

用心也君與兄禹山茂才友愛敦篤君嘗邀余與  
詞人飲榕堂見君兄弟怡怡壘簾唱和詩曰兄弟  
既具和樂且孺君其有焉以君之才亨衢直上詎  
不如人乃爲內翰爲中翰爲外翰爲部曹蹭蹬迺  
邇已逾中年晚歲將入都補官遽疾遄返遽歸道  
山士論惜之令子詠春年方弱冠能讀父書亦工

書法

松心  
文鈔

嶺海之曲有詩隱焉託松桂以長往謝軒冕而不  
事雖身處市閭而志成邱壑於是予乃得一造其  
廬而飲焉所居曰榕塘吟館

榕塘詩鈔小序  
黃侍郎曾滋撰



榕塘一名榕堂又名庸堂在廣州城內芳草街鮑  
逸卿太史別墅也有老榕一株古幹參天濃陰蔽  
日榕之下爲榕堂堂之下爲榕塘塘之上有樓有  
亭有軒有室有橋有廊春秋佳日榕塘主人置酒  
邀朋弦詩讀書一日同人會飲余偶得水學酒深  
淺之句逸卿卽席和云水學酒深淺驚人句最奇  
是日見塘水淺深不定余問乃知水通城濠濠水  
有長有消故塘水有深有淺也

聽松廬  
詩話

萬年松不知其所由名格致鏡原引五雜俎云楚  
中有萬年松長二寸許葉似側柏藏篋笥中經歲

不枯以水澆之俄頃復活逸卿愛種之賦詩云大  
者盈尺小徑寸坐對如入深山中余每過榕塘見  
松輒徘徊不忍去得句云松號萬年纔二寸我來

半日恍三生

聽松廬詩話

小羅

詠春字小羅

既奉其尊人詩集請余爲序又請輯

入詩人徵略余既爲摘其佳句再翻閱一過見有  
晚望西樵一律通首氣格清超因錄之詩云插天  
七十二芙蓉朶朶都歸夕照中烟火萬家團遠樹  
樓臺上界動寒鐘似從空際尋瑤島不辨巖邊走  
玉龍藤杖芒鞋明日事振衣同上大科峯

同上

摘句

青歸羊石三城曉白到鵝潭萬古流

登原星嶺

三秋將近見紅葉廿載重來餐白雲

白雲寺

偶然詞賦同騷客如此江山憶霸才

遊紅棉寺

柳港雙鷗消永夏梅龕一鶴守嚴冬

珠江雅集

眼底自生高下月袖中常有往來潮

集得珠樓

青山依舊無今古老樹迎人作主賓

遊石溪洞

終古青山常不老經秋紅葉亦長春

翠巖

佳日不隨今我去清尊端爲故人開

次韻南山

因尋勝地常畱句尙有名花解愛才

春遊之作

花逢春事千般媚酒與交情一樣深

春來有脚成今古雲出無心任卷舒

次薊園韻

溪洞舊鐫飛瀑字

南山書琴泉二大字余刻于石溪飛瀑之側

海天新築隔江樓

南翁聽松園有海天閣

龍鱗未老餘松子鳳尾初生長竹孫

贈吳道初

無可奈何花自落不如歸去鳥能言

倚樓得句目空世負郭無田胸有書

贈趙古農

有園便種千年樹此老能輕萬戶侯

贈鄭蔭崖

有人賣劍官多暇盡日彈琴更不勞

送林藻蓮

談元壇坫傳真氣晦跡蓬萊寄此身

黑牡丹

落英餐後無山鬼異卉看來失水仙

菊花

趙鏞

字少愚號笙南江西南豐人道光六年進士官兩廣鹽運使有笙南詩集

君年二十五以府試冠軍入學道光辛巳舉於鄉丙戌成進士改庶吉士散館改刑部主事丙申隨協辦大學士湯公金釗戶部尙書文公慶往陝西四川河南讞事丁酉隨文公往熱河戊戌又隨湯公及侍郎惠公吉往山西己亥隨吏部尙書恩公桂禮部尙書何公汝霖往浙江南河東河是年擢山西司員外郎庚子京察一等記名以道府用是

年授漳州府知府乙巳調福州戊申擢漢黃德道  
己酉署按察使授廣東鹽運使在任四年咸豐甲  
寅八月以疾終於省寓年六十有三君在刑部十  
二年精研律例故四爲隨員欽使諸公皆倚重  
之其在漳州也民風強悍習於械鬪君親歷七縣  
撫其善良鋤其強梗是風爲之稍息辛丑英夷犯  
順廈門失守海澄距廈門六十里君曰海澄若有  
失郡何以守卽日馳赴時守兵祇三百人君知兵  
力太薄故設伏以疑之凡口岸皆樹官軍旗幟夷  
恐有伏卒不敢進民賴以安在漳州三權道篆脩

造巡洋師船三十艘其在福州也武弁捕盜多以  
漁戶塞責君數爲平反夷人與民人雜處或貿易  
爭價或路拾夷物常因細故致啓釁端君親至彈  
壓解散不至釀成巨案戊申俸滿卓異入都

召見問出身履歷 訓勉綦詳跪對至三刻是日奉

旨補授湖北漢黃道其在湖北也署按察使秋審必矜愼  
楚北頻年水患君捐貲助賑親往履勘並建棚設  
廠災黎得所依歸全活甚衆其在廣東運使任也  
當粵商疲敝之日正軍需孔亟之時凡催完公項  
大府意主於嚴而君濟之以寬主於嚴者正也濟

以寬者權也君以爲操之太蹙卽查封革埠於

國課何補且粵商疲敝非盡商之咎也私鹽充斥  
官引滯銷不待言矣而數十年來代通綱懸宕無  
着之埠完餉數百萬代人受過挖肉補瘡此粵商  
之苦無可赴愬者也君惟以顧大局裕課餉爲重  
是以旣督責之又調護之庚戌辛亥壬子三歲奏  
銷如額征足至癸丑歲引銷一百餘萬爲十餘年  
所無然則君濟之以寬俾不至於決裂其心爲甚  
苦至是鬚髮蒼然而疾病亦自此始矣君在粵先  
後捐軍餉二萬四千兩奉



且嘗戴花翎並給二品封典君生平薄於自奉而厚於  
待人嘗仿范文正公規制立義田宗戚待以舉炊  
者數十家配劉夫人有賢德先君卒子三惟浩太  
學生早逝惟濂候選知州皆劉夫人出惟洛側室  
瞿氏出長孫從興惟浩出三品廕生余與君同出  
協揆湯師之門惟濂以事狀來請誌墓余爲誌之

且銘之

松心  
文鈔

君律例精熟吏事勤能人多知之不知其於經訓  
菑畬尤勤服習官部曹時嘗手寫五經一字不遺  
筆筆端楷又嘗臨右軍聖教序帖數百本於字體

之長短疎密一一神似蓋其平日心靜而專故隨

事不苟如此詰嗣勉之州牧惟濂於先人手蹟加

意珍護昨出觀數冊覺几席間油然經籍之光余

既獲覩故人之妙翰又深嘉令子之孝思展對移

時爲識數語以慰勉之不置之意云爾松心文鈔

摘句 四圍青嶂合萬樹綠陰初

良苗知氣暖早稻及時抽

飛花紅滿院細草綠侵階

詩禮過庭嫻鯉對布荆舉案相鴻莊清徽

清言霏玉常揮麈皓髮如銀不杖鳩贈友

國朝詩人徵略二編卷六十二

番禺張維屏子樹輯

斌良

字備卿號笠耕滿洲正紅旗人廕生官刑部侍郎  
有抱沖齋詩集

公以父光祿公 恩廕二品廕生引

見授主事嘉慶乙丑二十二歲補太僕寺主事捐員外郎  
丁卯選戶部員外郎辛未補郎中癸酉滑縣教匪  
爲亂公隨大學士托公津軍營辦理文案滑匪平  
賞戴花翎 京察一等乙亥授山東兗沂曹濟道丁丑改

授蘇松常鎮太督糧道庚辰升授陝西按察使調  
補河南按察使辛巳公爲撫部所劾奉

旨來京以四品京堂候補壬午補授太僕寺少卿甲申奉  
命赴察哈爾查驗馬匹六月還京復

命七月奉

命青海致祭湛巴拉多羅貝勒十一月還京復

命丙戌七月奉

命往哈什噶爾軍營辦事十月以陳奏遲延被議奉

旨以六部郎中降補丁亥補刑部郎中庚寅偕松湘浦尙  
書赴綏遠城讞案隨赴山西讞案丙申補授內閣

侍讀學士丁酉奉

命至土爾扈特

賜奠多羅郡王戊戌升太僕寺卿癸卯授都察院左副都御史授盛京刑部侍郎甲辰調任京刑部侍郎丙午授駐藏大臣丁未七月抵前藏十一月卒遺摺到京

上嘉悼久之

加恩照都統例賜卹

抱冲齋詩集年譜

公詩八千餘首公弟可盦觀察

法良

爲刪存五千

餘首刻抱冲齋詩集七十卷桂星垣觀察

文耀

返

粵出以見示因輯其佳句刻之

聽松廬詩話

閱抱冲集知口外菜蔬難得詩註云天寒無菜蔬  
台站供應一羊而已 又知塞外柴薪難得詩題  
云蒙古風俗以牛糞代薪 又知塞外樹木難得

詩註云自那林行一千里惟見榆二本

聽松廬詩話

公出張家口至音圖句云立馬高吟神更王四千  
載內第三人詩人曾到者惟元遺山薩天錫耳

斌笠耕過郭汾陽故里一律甚佳錄之隻手重回  
天地春良哉唐室股肱臣澤深漸化羗夷眾才大  
能全富貴身晚歲聲歌聊繾綣後堂兒女任喧曠  
我來故里懷遺蹟似此王侯有幾人

聽松廬詩話

摘句

初月乍生樹夕陽猶在山

晚歸

馬蹄秋水碧虎眼夜燈紅

塞上

關山兩崖夾秦晉一河分

潼關

三盃澆愁添白墮一燈搖夢怕黃昏

夜坐

事當有觸悲歡集情到無聊去住難

贈漢子耕

道從殘雪消時認山向遙天盡處看

曉行

三百六旬將盡夜二千餘里遠遊人

旅次除夕

孔雀東南飛忽杳牽牛西北坐相望

無題

天末枕戈鄉夢遠帳前磨盾羽書催

夜宿開州

驚沙幕捲晴天雪黑夜燈搖陸海星

開州軍營

九邊戎馬將軍帳五夜封章宰相燈

上章  
桐門

百姓其魚今幸免九方相馬已無儔

漫興

雞鶴同羣原不混熊魚齊嗜那能兼

女間何止開三百義俠今猶說五人

虎丘

四圍芳草鳴駝外一髮青山落雁邊

塞外

心傳賢聖同師範世系唐虞盡子孫

黃帝  
廟

七擒七縱天威振三顧三分帝業成

武侯  
廟

洞花屹鳥三千里蚓曲蛇盤十萬山

西藏

到眼千篇嫌臭腐得心片語愛清新

讀詩  
有悟

燕瘦環肥同嫵媚各人面目各精神



李逢春

字際泰號孚亭廣東南海人國學生詹事府主簿  
有孚亭詩草

君世居南海茅洲西村有田園水木之勝君考

誥封奉直大夫興齋公生五子君居三兄弟五人  
同學相友愛興齋奉大府題咨承辦廣東全省硝  
磺旣歿君承父業率由舊章道光癸巳西潦盛漲  
厥硝淹沒君歎曰可以止矣遂稟大府辭退由是  
以訓課子姪爲事子長榮廩膳生歲科考五次經  
古皆一等姪文燦廩膳生中式壬子科解元欣榮

以縣試第一入庠歲科考屢列一等旋補廩膳君  
見子姪皆有成立益勉以親師取友力圖上進君  
樂善不倦凡建宗祠築基園修橋整路濟困賑饑  
皆捐輸弗吝長樂善養志鄉有樂圃城有柳堂請  
黃香石舍人繪樂圃圖蘇枕琴上舍繪柳堂圖君  
時與二三朋舊銜盃敘心一日君從兄躍門過柳  
堂君話及同胞五人惟己獨存歛歔者久之越數  
日忽以微疾泊然而化時道光庚戌八月十七日  
也享年五十有八子一人長榮孫八人長榮奉瞿

翁所撰行狀請輯入詩人徵略

聽松廬  
文鈔

硝磺議一卷李逢春撰 此書於硝磺事例考究  
詳明茲撮舉其要於左

硝 本作消俗譌爲硝 案非譌也古作消後人  
作硝以別於消猶之古作沙後作砂以別於沙  
硝不同 朴硝性寒而降治病用此

硝石性熱而升火藥用此

辦硝 辦硝非購陳坭則買鹹砂

陳坭出於內地 鹹沙來自外夷

陳坭 陳坭出旺之地莫如香山新會開平鶴山  
以及順德之馬甯等處 嘉慶十四年理事同

知稟請藩憲諭各縣凡有陳坭之家遇硝商持  
照採買務照價出售

鹹砂 鹹砂乃夷船壓艙之物例不起稅

嘉慶十一年議於丈量時將砂數報官起貯夷  
館由藩司給照硝商盡數清買 硝商領照到  
黃埔及澳門買鹹砂聽夷商公平議價

洋硝 夷船到粵匪徒往往將貨物私換洋硝

嘉慶二十四年硝梟曾廣明將糖三萬餘斤私  
換洋硝三萬餘斤經番禺縣汪辦理在案

火藥用硝

火藥百斤准用硝八十斤

乾隆五十七年定

礬 本作黃 淮南子夏至硫黃澤 後人借用

礬字以別於黃 古礬字謂銅鐵樸石

舶硫 正字通舶硫似蜜黃

倭礬 倭礬可作火藥 乾隆三十四年奉

上諭海外硫礬運至內地即可隨時收買以備軍資

英礬 粵東硫礬產自英德縣之貓耳山今多用

英礬不藉倭礬 官礬百斤領價四兩有奇

火藥用礬 火藥百斤准用礬炭各十斤

匠用硝礬 部定匠硝每年不得過一萬五千斤

礬每年不得過七萬斤

硝磺性不同 硝性直行磺性橫行

硝入杉炭則直發

硝磺均宜淨 硝中無鹽磺中無砂然後製火藥

可收制勝之用

粵東額設火藥 嘉慶十一年總督吳巡撫孫會

奏查粵東各營額設火藥九十一萬三千餘斤

以上撮錄硝磺議 參以老漁閒話

李孚亭訪杏林莊主人不遇因集王右丞句題壁

詩云羨君棲隱處董奉杏成林每逐青谿水空知

黃綺心雲霞成伴侶江海遂飛沉海上尋三島思

歸何必深

杏莊題詠

順德大晚鄉文明里詩會首題賦得五風十雨得

年字五言十六韻李際泰句云善也人方御寒之

氣詎偏宅當楊柳戶里數杏花鞭屈指琴笙裏禮記

五日彈琴而不成聲十日而成笙瑟關心水石邊此數句切五切十

用意措辭可稱工細文明里詩會詩選本

文明里詩會約六百卷李孚亭卷取列第三十一

名其詠游絲絕句云鶯啼小院黯春陰霧影煙痕

杳莫尋牽到柔腸難斷處才人情緒美人心後二

句借物寫人語兼比興聽松廬詩話

摘句 蘆花千頃白漁火一燈紅

業冀千秋遠身妨一味閒

婦兒長榮姪欣榮

白頭尋老友黃菊放新花

邀黃文緣賞菊

英雄事業艱難備忠孝文章血性真

虞翻未必無知己羊祜從來不酖人

少日梅花何水部中年絲竹謝東山

贈何紫閣

謝豐浦兩太史

五千道德傳家學八百孤寒愧古人

生日述懷

海外人通廿一史

夷人有藏二十一史者

煙中帆織

十三行

珠江曉望

閒澆白酒評今古老擁青燈課子孫



何朝佐

字堯宗號萃圃廣東香山人官臨江府通判有六  
有軒詩草

君幼穎悟未冠肄業粵秀書院名在前列兩應鄉  
試皆薦不售遵父命援例捐通判分發江西歷署  
建昌府同知九江撫州兩府通判攝德化宜黃二  
縣事題補九江通判旣而奉文裁缺乃補授臨江  
府樟樹鎮通判君在省垣大吏察君勤慎數委以  
差務先委辦萬年吉地桅杉木植又委辦年例  
額木又委辦顏料前後凡三次解赴都中所辦皆

安善辛卯 恩科充江西內簾掌卷官君在官凡  
利於民者知無不爲捐廉俸以濟災黎懸賞格以  
嚴緝捕刊格言以勸閭閻善政不可枚舉其尤著  
者宜黃斷獄一事宜黃有鄒麻子猾匪也先與余  
傅氏有姦余傅氏生四子長賓俚次黃俚三冲俚  
四尙幼夫死鄒麻子遂強占爲妻麻子與其族某  
有隙因起意誘冲俚夜至某門外殺之欲株累於  
某冲俚將死口呼其兄於是報案者謂賓俚殺弟  
獄疑未決君訪得姦狀摘鄒研訊再三乃吐實鄒  
至省復翻供大府委官鞫訊久之卒如議定案也

人至今稱之宜黃前任王令有已徵民賦逾限未  
解將干吏議君以已所徵者代解王之官獲保全  
君厚於待人多類此君事親孝親病侍湯藥衣不  
解帶者十餘日後雖在官常以葬事爲念丁酉君  
弟書來知已得地君卽引疾時自勤適由甘肅請  
假至臨江待君旋里十月奉君考奉直公妣趙宜  
人靈柩葬於鶴山縣葬後數月而君卒年六十子  
五人自蕃浙江布政司照磨自超候選府經歷自  
勤甘肅合水縣典史自新國學生自江按察司照  
磨銜孫十五人杰年候補訓導舜年綺年逢年皆

邑庠生鑄年安徽巢縣典史餘業儒曾孫三人君  
生平寡嗜好惟喜爲詩少時與同志數人爲吟課  
刻有貫虹八子詩在建昌與諸名流唱酬有盱江  
題襟集又喜誦前哲格言旣重刻茶根譚病中猶  
以朱子家訓置榻前誨諸子

松心  
文集

先君署縣令時有清官之稱後先慈李宜人七十  
生辰兼娶孫婦客撰賀聯有云一門四掇芹英僉  
謂清官之報七秩五開梅酌真承慈母之歡是時  
五娶孫婦而杰年舜年綺年逢年同時入泮姪孫  
廷霖亦於是年進庠

府君行狀  
自審謹述

先君嘗白書楹帖云民德曰新敢謂誠能動物臣

心如水何妨儉以養廉

自蕃自勤

作吏浙甘兩省

每接手諭皆以恪守官箴節儉養廉爲訓

行述

余與莘圃通守同官江右同寓章門公餘輒彼此  
過從或把酒論文或品茶譚藝莘圃爲人宅心醇  
厚處事精詳其爲詩抒寫性情不必雕章琢句刻  
意求工而雲在水流時有陶然自得之致余自江  
右歸來聞令子緼石參軍家居頤養爲善於鄉而  
諸孫濟濟多才或襲序蜚英或仕途騰茂熾昌未  
艾流澤孔長今秋虎臣學博

杰年

奉尊甫命以六

有軒詩草示余因摘其佳篇警句刻入詩人徵略

二編并書數行於簡端以復之

松心  
文鈔

莘圃讀出師表詩語語適健詩云字字扶劉意時

窮力不窮三分悲虜運兩表託孤忠涕淚臣心盡

艱難帝業空千秋魚水契回首永安宮

聽松廬  
詩話

莘圃先生少與同志結五柳詩社祀陶淵明又結

貫虹詩社祀李杜二公故其詩多有古意

深柳堂  
詩話

南山誦易水懷古句云如此肝腸如此膽莫將成

敗論荆卿莘圃翁博浪沙懷古句云千金有意邀

游俠一擊無功亦丈夫皆不以成敗論人者

同上

摘句

飛瀑千重落層巒列嶂開

遊麻姑山

林密涼宜夏山深暑亦秋

書聲窗畔月茶味竹間樓

北窗高臥少南國別離多

杯浮人影月客集畫詩書

集建武郡齋

花自成知已人誰覓賞音

並頭蘭

焰滅疑沾露烟香半雜花

燒葉

貌非前日貌衣是舊時衣

擣衣

會可八仙聊中酒人無百歲且當歌

除夕餞歲

千金有意招游俠一擊無功亦丈夫

博浪懷古

霸圖畢竟長銷歇片瓦猶堪說鄴城銅雀臺

歲月虛過成浩劫功名勘破卽神仙題邯鄲驛

一島尙能延國脈三忠曾此誓孤軍官富山

詩可掄元才命世生當厄運義忘身題牡丹詩

三月鶯花催祖道廿年朋舊賦河梁都門別

香火是仙還是佛英雄同轍不同時麻姑山

白月在天星在水紅菱爲飯蓼爲裳東湖夜泛

蕭條宦况逾三載淡薄情懷自一家

憐汝乍眠還乍起送人春暖又春寒柳

入室未應慙五柳看花何必問重陽菊



謝有文

字蔚林廣東番禺人諸生有娛暉閣詩草

先伯兄性孝友嗜學能文耽吟詠少時與仲兄芝田同筆硯與倪秋槎梁子春曾勉士熊遂江爲文字交嘉慶壬申受知於程鶴樵學使補博士弟子員癸酉舉秀書院甄別超等首列山長邱滋畬先生極器重之後從譚康侯夫子遊益肆力於詩聽雲樓集中有與蔚林論詩之作可以見師弟相得之深也丙子秋闈薦弗售隨康侯夫子入都赴京兆試丁丑秋因病旋里戊寅鄉試猶力疾入場是

年臘月卒年三十一著有緣香堂文稿娛暉閣詩

鈔燕遊草

謝秀才文行述  
同懷弟有仁撰

謝靜山都轉以其兄蔚林秀才遺稿並行述詣余

請選入詩人徵略蓋惟恐其兄身名俱歿是克念

天顯篤於友于者也余爲此書意主揚善亦兼闡

幽凡有志於學而不永年者必爲之表其行錄其

詩存其人雖數千里外漠不相識之人但有佳句

可采亦必爲輯之刻之而况朋友之兄弟乎余旣

摘錄蔚林詩句因并自述區區撰著之意如此覽

是書者可以識余之心焉

聽松廬  
文鈔

蔚林爲譚康侯農部入室弟子其短歌行有云五  
嶽起方寸輕身上丹邱神光離合雲海浮御風鶴  
背逍遙遊長空倒捲天河流爲君一洗萬古愁此  
詩於其師可云具體聽松廬詩話

蔚林詠鼻煙有云似煙仍非煙厥草惟何草薰從  
艾蒨清雜之薑桂燥葡萄酒細調薔薇露同擣一

縷吹息微九轉還丹早賦物可謂細切同上

摘句 丈人千化身美女雙盤髻浪陽峽望諸山

夢隨出山雲化作人間雨宿白雲寺

投林鳩逐婦遵渚雁來賓

薄酌分賢聖狂歌動鬼神

流水咽清磬斷雲低遠峰

高樹留殘月新霜損綠苔

風急舫聲勁江空人影寒

古臺寂寞留青塚當日安危仗玉顏

昭君

青衫司馬來湓浦白髮何哉唱渭城

有感

壯志年來多抑塞離愁夢裏太分明

旅懷

倍覺春寒生眼底二分雪色一分山

富春雪霽

一種閒情無著處笑拋蓮子打鴛鴦

消夏詞

修到神仙還惜別乘槎我欲問雙星

七夕

余既輯謝蔚林秀才

有文

詩付梓矣靜山又檢得

數首請補入蓋不忍其兄之心血就湮故懃懃懇懇如此亦足以愧夫世之薄待手足者矣爰補錄之以慰其原隰孔懷之念云

詠史四首

殺妻以求將爲釋時人疑烹子以代膳不忍令君  
飢浮名何足榮骨肉良堪悲憤激與矯詐皆非情  
所宜奸人務濟欲達士惡矜奇坦坦若平易後世  
豈無知峩峩子陵臺千載高風垂

楚王賜千金欲報一飯恩千金賜非厚一飯難比

國朝詩集卷之二  
倫紛紛富貴交誰能哀王孫世俗急趨炎困塞誼  
難敦丈夫不得志婦女多微言蛇行匍匐時季子  
位已尊

數奇不封侯壯士心已摧兔死走狗烹念之更可  
哀飄然託辟穀去去不復回言從赤松子萬事方  
悠哉

雲臺圖功臣不列馬伏波銅柱界絕域頌德手屢  
摩虛名不足道薏苡傷如何塞北牧羊叟持節如  
枕戈歸來典屬國白髮仍蹉跎志士多苦心自昔  
爲悲歌

黃廷籍

字宏簡號西山廣東香山人諸生有枕蓮吟館詩鈔

廷籍爲霽川封翁之長子少讀父書逮事重闈人無間言年二十四受知於程鶴樵學使補弟子員五赴棘闈屢薦不售時大父在堂欲爲援例出身籍以義命自安勤學不輟性恬淡寡欲喜吟咏不預外事本族向無家課請於族老月三課設獎賞多所裁成以故能文章登科第者較前爲盛生平

和以處衆而訓子弟綦嚴儉以持躬而助親朋不

客道光壬午六月以病卒年三十四士林惜之以胞弟廷昭官工部員外郎贈奉政大夫以子承謙官內閣中書加五品銜贈朝議大夫著有毛詩集說見山書屋制藝枕蓮吟館詩鈔

黃氏家譜

西山封翁夙工制藝蜚聲庠序屢躋棘闈中年謝世士論惜之令子益齋中翰克承家學早舉孝廉文藝旣工詩篇益富兩世詩集次第刊行豈惟風雅傳家具見詩書式穀

聽松廬詩話

西山詠秋河云萬里微雲淡橫空一水寒仙從秋夜渡人倚畫樓看橫空一水寒寫秋河神妙

同上



摘句

人生不滿百有如駒過隙禹寸與陶分我  
輩宜愛惜世路有窮通遭際有順逆時命  
本不齊胡至爲境役不若讀我書隨分得  
所適風雨一廬間其樂樂無極豈徒得糟  
粕更宜取精液物盈則易虧心虛乃受益  
學問靡有涯師在能自得

述懷

西山述懷詩數十韻余節取數韻後生

子弟宜錄之可爲座右銘

聽松廬詩話

人生俗氣難捐除讀書能令人不俗人生

濁氣難擺脫讀書能令人不濁

讀書

滿城榜已無花到九日糕還有字題

秋榜後作

入世自知難免俗讀書原不爲沽名

自遣

程途遠大惟期汝少壯蹉跎漫學余

示謙兒

他山之石懷攻玉其臭如蘭憶斷金

贈鄭玉輅

時窮易灑英雄淚身蹇難酬祖父心

試後遺懷

世態宛如蒼狗變此身終過白鷗閒

漫吟

四壁圖書分左右一簾花月自春秋

書齋題壁

難得常圓似紈扇一燈旅舫夜題詩

珠江卽事

秦淮不少如花女莫向離人唱柳枝

戲贈

同遊記得桃花路一飯胡麻是夙因

寄鄭豐川

黃廷昭

字懋簡號萬青廣東香山人官工部員外郎有宦  
遊詩草

萬青工吟詠善鑒別金石書畫王省崖相國祁春  
圃尙書彭春農學士張翰山方伯皆稱許之然優  
於文而畱於遇需次部曹與北闈者三戊子一薦  
於朱青侶給諫壬辰再薦於石愚臬比部卒不售  
萬青家居多義舉力所能爲者無不爲如修文廟  
創崇義祠濬橫逕河諸事皆竭力捐貲身任其勞  
曾卓如京兆屢爲余言之其與卓如倡建香山邑

館於都門則余所親見者植品甚峻官斯土者雅重之而未嘗干以私生於乾隆甲寅終於道光乙

未年四十二官刑部廣西司主事工部營繕司員

外郎候選道著有宦遊詩草

黃工部延昭墓誌許尙書乃普撰

萬青過沛懷漢高祖七律辭氣警健錄之誰同逐

鹿費經營帝業原難以力爭五色雲隨天子氣一

歌風起故鄉情龍飛有志蛇先斬免死無憂狗盡

烹當日王居何處訪已無遺老話生平

聽松廬詩話

周公恐懼流言曰王莽謙恭下士時若使當時身

便死世間真偽有誰知此白香山詩發人所未發

黃萬青詠曹孟德句云若教討卓身先死萬古忠

奸論孰分亦是此意使孟德死於討卓之日不居然漢忠臣耶聽松廬詩話

昔人句云郎忽相逢妾難避大家都是落篷時此

不欲近而偏近萬青句云可恨無情是流水兩舟

相近又飄開此欲近而偏不近各有情致同上

摘句 流水新相識青山舊有情再泊渡口

淚隨紅葉落神共白雲馳秋日思親

臨風知己淚落月故人思別僚友

人誰托肝膽爾可共悲歡別歌者

伴我艱難惟夜月感人容易是秋聲秋夜感別

上聳孤峯無地著中流一孔有天窺

觀音巖

東浦水連西浦水大姑山接小姑山

晚泊九江

魏史有書尊武帝漢碑無字表將軍

曹孟德塚

滿院落紅花戰雨半堤滴翠柳拖烟

平山堂

客至舟車原合路人來水陸各分程

清江浦

明月二分光泛水垂楊千樹綠連城

揚州

一代風流思帝子千秋詞賦屬才人

滕王閣

邀月舉杯聊爾爾問天搔首欲云云

弔李太白

逐鹿有謀扶漢主縛鷄無力本書生

弔淮陰侯

樂極勿為長夜飲有人燈下卜金錢

秦淮夜飲

杜游

字善輝號洛川廣東番禺人貢生官儒學訓導有洛川詩略南園別墅詩集

君世居廣州城南尊甫朝議公生八子君行六弱冠後補博士弟子員於制藝極攻苦乃屢試不售以明經援例候補訓導君爲人質直坦白意所不可雖尊貴人必詆斥之意所可雖微賤人必稱道之篤好吟詠其爲詩有觸卽發往往真氣湧出其書亦有勁氣其畫花卉尤專長出筆有蒼健之姿無軟媚之態蓋生性使然也君不善治生屢至空

乏幸而求畫者踵至有畫一冊而酬以數十金者  
暮年頗賴此以自給焉君善病輒自醫醫輒愈今  
春修禊談讌如常越數日偶病誤聽庸醫服攻下  
之劑遽卒時咸豐三年四月二十六日也年五十  
有九子四人洪疇先卒洪寬業儒能讀父書洪森  
洪濤皆幼孫四人

松心  
文鈔

松心子曰洛翁疎財尚義嘗以三百金典一店未  
久店之原主病卒其妻欲守節而無以養口洛翁  
聞之慨然以店與券還之其妻有以自存不至改  
適翁存心若此人謂翁後人必有興者

同上



洛川詩初由白陸入手漸肆力於李杜故其遺興之作每近太白憂時之作每近少陵要其襟期超

曠吐屬自然終以白傳爲歸

香石詩話

洛川畫花卉深得白陽石田少谷青藤石濤諸家之勝彭氏厯朝畫史所稱尙未盡其妙

同上

洛川珠江詩云卅年不作橫陳夢髣欲畱時我去時或問何故洛川曰吾非不動心也恐偶染致疾爲終身憂耳此語可以醒迷可以却病

拋松廬詩話

洛川關南園別墅於慈度寺與南園一水遙通終日作畫吟詩幽賞不輟一時名士過訪畱題楊慰

農觀察求其畫不可得乃親叩禪關索一冊去觀

察之風雅廣文之孤高人並稱焉

十二石山齋叢錄

洛川廣文詩如不才似我難言屈造命由天那得  
忙狂如賀監方稱客醉不劉伶枉贈侯白鵝依舊  
歸前浦赤鯉何時上太空皆不假修飾自然清超

書畫亦工妙

寄心齋詩話

有自書詩集雕板以行者鄭板橋集是也有門人  
一手寫全集雕板以行者汪堯峯集是也洛川詩  
略合三十二人皆工小楷者分手書之雕板亦精

一時紙貴此亦詩集中罕有之善本也

松軒隨筆

余所居深柳堂在太平烟濳坊額四字陳獨漉先生隸書洛翁詩云誰知懷古詩人意石刻重尋獨漉書卽指此也翁與余爲忘年交暇輒過柳堂咸豐癸丑上巳余招諸公集柳堂二十三日南山師復於斯堂展修稷翁意興甚豪爲詩極悲壯乃三月二十五日翁病作四月二十五夜翁病終逝水難畱停雲宛在展翁遺集爲之愴然

深柳堂詩話

李雪樵太守附柳村大令皆深於制藝皆延洛翁

襄校試卷人謂嘉賓賢主相得益彰

老漁閒話

洛川隨筆

又名家庭絮語

有益於身心者摘錄於左

責人不如責己

人生如飛鴻踏雪

齋口豈若齋心

世事類蒼狗浮雲

不明事理恐失之愚

多愁則歡場都成苦海

太察物情必至於刻

曠達卽蓬戶亦有桃源

勤是美德太苦則損元神

淡是高懷太枯則無樂趣

多財而不畱名是謂無福

有力而不濟物是謂虛生

山積卑土以爲高學宜漸進

河合細流而成大事貴集思

爲善而求知陽德何如陰德

好施而苟取善人仍是罪人

耿介之儒可以愧貪污不可以傲豪傑

凡庸之輩能與共安樂豈能與歷艱難

方寸只自知當一念初萌務要隨時省察

分毫皆有定任百般計較枉勞畢世精神

善字本與生俱來爲所當爲即使果報全無亦

要保此良心存吾直道

惡孽乃歷年自作改宜速改莫因冥罰未至便

謂憑茲威勢任爾橫行

摘句 生涯雙管裏世事一杯中

有神方是盡無趣未爲詩

月邀雲作友風教樹招人

秋夜

人到無求真富貴天猶有憾况塵寰

讀書勿放一字過鍊句要使千人驚

日無功課餐常愧事有欺心睡不甯

滿地綠陰涼世界四圍紅袖小神仙

集聽松園

主人旣去花爲主仙客能陪我亦仙

集杏林莊

詩草拾來名士手浪花飛上美人衣

珠江泛舟

如我自知才德薄有誰能保子孫賢

鄭齡

字永年號夢九廣東香山人國學生六品銜有可權書屋遺草

嘉慶乙丑海盜滋擾夢九與邑中紳士建立墩臺團練鄉勇守禦有功香山縣令彭昭麟通稟大憲制軍那撫軍孫給以保謀固圉扁額又義襲枌榆扁額庚午春有三烈婦罵賊沉海屍流至下閘夢九邀衆捐貲埋葬於西鄉邑人稱之戊辰重修大宗祠生平義舉多類此以子廷楓官浙江仁和場鹽大使覃恩贈修職郎

鄭夢九事略

夢九詩雖不多然卽詩可以見其人洵屬有用之才惜乎其年不永不獲見用於世也夢九有子七人廷植廷楓廷梁廷榮廷棟廷枚廷杰今春廷杰奉可權書屋遺草屬黃益齋員外寄余因爲摘句

刻入詩人徵略二編

聽松廬詩話

摘句

輕敵誠鹵莽失援自顛蹶

送彭邑侯并述海氛

窮寇且勿追知彼莫相逼

同上

年來兩粵兵事章武舉

允升

翟守備

瀚

文饒都司

成龍

三人皆勇將惜皆陣亡

因見夢九詩有輕敵之語憮然書此

同上



時余兩弟兄力言行保甲保甲令一行姦  
宄不得匿

保甲良法人皆知之然良法不足恃總  
視平行法之人王安石行保甲鄉民驚  
擾至有截指斷腕以避丁者司馬溫公  
奏請盡罷諸處保甲民乃獲安談保甲

者宜知之

松軒  
隨筆

濱海鐵城號樂土二百餘年民安堵靜則  
生動逸生憂慘遭荼毒不勝數

海匪

靜生動尙屬恆言逸生憂尤爲警策往

往憂患之機卽伏於逸樂之日特世人

不之覺耳夢九有見於此固非弄月嘲

風流連光景者所可比也

聽松廬詩話

中有一物人可跨昂首空腹背如瓦楸桐

榆棗取用精運動何曾滅流馬

秧馬歌

東坡秧馬歌後人罕見佳製夢九此作

似可嗣音

同上

離魂先欲怯短笛更難聞

送方震川


雪裏醉酣今日酒夢中吟是故人詩

和宋芷齋

兩袖輕風飄柳絮一亭疎雨濕桐花

送別

童宗瑩

字  號肯堂福建同安人貢生軍功六品銜有

什竹齋詩草

陳筠竹通守

渭陽

與童肯堂明經交相善也肯堂

既歿筠竹三千里寄其遺稿屬余選入詩人徵略  
筠竹篤於友誼可謂生死不渝矣惟未見墓誌亦  
未見行述無由知其生平但卽其詩觀之知其讀  
書爲善之餘癖耽吟詠筠竹稱其諸子蒙古蒙求  
蒙亨蒙升蒙 皆力學能文均已入泮將見棣華  
騰茂雁序聯翩燕翼詒謀慶未有艾也

松心  
文鈔

游子有歸期初聞喜可知商量書外語檢點別來  
詩小雨黃昏候輕風白袷時計程頻屈指依舊費  
相思此童肯堂聞陳筠竹歸信志喜詩也語語真  
切可想見兩人交情但雖有歸期仍未得會面收  
句依舊費相思五字尤善道人心事

聽松廬詩話

童肯堂性愛梅有兩絕句說梅花甚佳錄之其詩  
云寒威凜凜透窗紗寂寞園林處士家風雪滿天  
都不管憑欄袖手看梅花又云旅館蕭條覺夜長  
一輪冰鏡下迴廊昨宵忘却關窗臥醒後梅花影

滿牀

聽松廬詩話

騷鏡四卷同安童宗瑩撰卷首有自序一篇又凡  
例十四則其書體例每句有註每篇之後有總論  
其大旨謂屈子當日孤衷難以顯敘故借詭幻怪  
神之事以寫其忠愛誠切之懷雖亦前人所已言  
亦有獨出已見處於離騷亦可謂好之篤矣

松心  
文鈔

摘句 孟嘗此日生靈均此日死同一天中日生

死難並擬狡兔三窟宅汨羅一江水噫嘻

生田文何如死屈子

人所共知却未有人拈出至於生田文

不及死屈子二語尤警

聽松廬  
詩話

古來名勝游端藉詩篇紀

風聲三徑竹月影一牆梅

冬夜

片雲帆背轉疎雨雁邊秋

曉渡

青山沙鳥外紅樹夕陽邊

晚眺

逢花思得酒對景欲成詩

入輪山

好山能補樹怪石喜當溪

鐘聲烟外寺人影水邊樓

東風遊子路春雪使臣衣

贈陳鈞竹

橋上行人談醋字於今猶頌蔡公功

溫陵懷古

讀罷南華經一卷滿天梅雨欲黃昏

初夏

苻堅矜獨斷淝水摧雄師憲宗斷乃成淮蔡遂誅  
夷齊專任管仲燕專任子之齊以專柄與燕以專  
柄危化裁各因人難以成格施趙括讀父書一敗  
乃不支曹參守成法相業皆前規法古與變古達  
人貴識時豈獨此數端凡事皆如斯

化裁各因人難以成格施邇人之論所以可立

尤貴可權執一恐其廢百

聽松廬詩話

王祥臥寒冰事母天性篤一朝晉篡魏乃食典午  
祿溫嶠絕母裾徑情何遽促誓師出勤王晉室乃  
匡復聖賢論天倫忠孝本兼勗兩公事君親彼此

何抵觸孟德舉孝廉君后乃肆毒文山少豪華大  
節遇張陸論世先知人慎勿限邊幅

王祥臥冰不能掩助簒之愆溫嶠勤王豈足贖  
絕裾之罪曹瞞固屬奸雄而本心可諒文山雖  
好聲伎而大節何傷前塵渺渺逝水茫茫欲尙

論夫古人恐難終乎更僕

聽松廬詩話

堯舜始敷教道如日中天孔孟萬世師聖教逾昭  
宣儒林古有傳道學後始編柰何宋元後門戶爭  
相沿遂謂道有統非是無真詮天理本共有人心  
亦同然大道若大路奚有私祕傳



黃廷彪

字炳禹廣東南海人官都司世襲雲騎尉有惜陰  
軒吟草

黃生年方齠齔以其尊人歿於王事

朝廷恩恤賜襲雲騎尉生善騎射武略精通復有志於  
儒者修己治人之學其器識之宏遠可謂加人一

等矣

惜陰軒集序  
田明經上珍撰

余與都閫談詩幾二十年親見推敲甘苦且於都  
閫持己之廉勤待人之敦篤知之最詳讀是詩者

可略見一班矣

惜陰軒集序  
黃孝廉位清撰

摘句

山光當檻出海色抱城來

粵秀山學海堂

天子交情忘貴賤故人同夢動星辰

嚴子陵

六代幾人明出處一言定鼎屬先生

諸葛草廬

萬里無家憐髻白一生憂國獨心丹

杜少陵

世事由來都屬夢人生難得是知音

書懷

每聞韻事心如醉多恐愁生髮不公

難酬明月當頭照最好家山未老歸

寄內

春去落花紅帶雨曉來芳草綠含烟

夏日

四野秋容楓樹醉一庭霜氣菊花知

秋思

暑氣未深涼氣透夏初風景似初秋

初夏

倪承詵

字同人號三橋廣西臨桂人諸生有寄塵山房詩集

君祖籍紹興遊幕粵西遂爲粵西人事親孝生平至性纏綿而天懷曠達貧而能樂君其庶幾焉好藏書籍法帖尤耽詩酒其爲詩主性靈有時亦運用典籍有時亦著意推敲沉至之語偶近唐音率易之篇多沿宋派至古詩音節未協體格未醇則君自知之其自序有云或合聲調或乖音節皆所不計第以存吾心跡云爾卒于龍州官署年四十

六著有古今秘苑南行雜記詩話諸書其孫始達  
字雲衢年方弱冠能讀祖書寶藏祖之手澤又欲  
廣其流傳請輯入詩人徵略君九原有知亦當欣  
慰如雲衢者可謂君之孝孫矣

聽松廬  
文鈔

余乙卯至桂得交老圃心識之曰此吾友也癸亥  
既去嘗得交三橋復心識之曰此亦吾友也二友  
不以今昔改心不以貴賤二致

桂林二友詩序  
聞縣黃世發撰

萬流爭一石倪三橋句灘之險水之急五字寫出  
高青邱清明無客不思家句膾炙人口倪三橋除  
夕何人不憶家句真至處不多讓

聽松廬  
詩話

三橋五律有沉着者對月云月是前宵片人爲異  
地人可憐千里夜還照百年身吟共猿聲苦宿隨  
鷗影親不知雙婦夢誰得到江濱亦有蘊藉者雨  
夜云花外重簾雨春深半夜燈正愁吟未穩那計  
睡何曾漏遠聽難辨童眠喚不膺今宵真寂寞恰  
似在家僧 六言亦有野趣疎疎落落茅舍三三

兩兩人家又是一村烟火纔開半樹梅花

聽松廬詩話

標題

閒居百韻

昆崙關

過虎跳灘

以上五古

歐陽湘東畫歌

復以麥魚招耦賓

以上七古

摘句

有村皆禁火無處不飛花

寒食

鳥來情共熟秋到客先知

橫槎題所居壁

昔年曾識汝今日又逢吾如何千里外相

見不相呼

對鏡絕句  
愈質愈妙

聽松廬詩話

狂士既成修禊服美人初試踏青鞋

暮春

三月雨催寒食去五更風送杜鵑來

落花

寫風雨便是寫落花不寫題兒寫感神  
尤覺淒切動人

聽松廬詩話

去日茫茫如過客頻年草草作勞人

述懷

自覺家和有餘樂縱多內顧亦忘憂

君妻妾極和睦世之聞河東獅吼者觀  
此得無歎羨耶

聽松廬詩話

滿地苔花堆落葉一天風雨送殘秋

立冬

劉杰

字士卓號扶山廣東順德人有蝸寄山房詩草

扶山內行敦篤早棄舉業性耽吟詠尤愛梅爲詠  
梅集古七律三十首遠近咸嘉賞焉生平客惠州  
客高州客閩浙客川陝足跡萬里性慈愛所到之  
處放飛禽放水族歲計數千刻四勿圖說刻惜字  
說刻宰牛戒皆有益於世急朋友之急家屢空曷  
如也書法出入二王間寫蘭竹有條然出塵之致  
卒年七十次子潛蛟亦工詩

聽松廬詩話

劉扶山太夫子有詠梅詩三十首一時名流入粵

者題詠殆遍秦小峴侍郎藏詩云底用勞勞事走

趨只應蝸寄愛吾廬梅花百本詩千首阿父王吟

子善書末句兼謂雨湖師也時雨湖師甫十餘齡

而名動海內今將白首矣猶潦倒名場日抱太夫

子遺稿以未付梓爲憾余與吳星儕輯嶺表詩傳

爲摘錄數章或者不盡湮沒耳

十二石山齋詩話

扶山武侯詩云紛紛割據策羣豪誰及隆中抱膝

高才鳳雛方管樂心懸龍種謝孫曹河山天已

三分限征討師猶六出勞一笑史官爭帝魏遂將

成敗短鈴韜當先主三顧未行孫曹已爲薦招致



武侯不仕孫曹蓋帝室之胄念念不忘也心懸龍

種謝孫曹論古最爲有識

嶺表詩傳

摘句 功寧下神禹傳恨合荀卿

孟子

婦女居然肖神仙未可知

留侯

節自高終古詩還歷晚唐

羅江東

在日不諧俗流風尙感人

李抱真

合離見風雨呼吸動星辰

羅浮

赤日照不到白雲歸亦閒

鄭仙巖

酒帘江上市簫管畫中船

與胡介根黎二樵泛舟珠江

蛾眉寵失仍哀郢魚腹魂歸莫問天

三閭大夫

謀就魚腸終覆楚眼看烏喙竟忘吳伍相國

大賈滅秦君滅楚陰謀總仗女戎兵春申君

世間多少稱夫子難得坡仙句裏呼翟夫子舍

南溟水遠連三島東粵山雄夾二樵鎮海樓

驟馬舟車銷歲月東西南北走風塵客中感懷

詩尋疎雨梧桐外人在寒烟橘柚間訪黎二樵

信知天上無雙品獨占寰中第一春詠梅集古

半壁暗泉飛冷雨一枝春信到孤山詠梅集古

丹崖翠壁千萬丈竹外松邊一兩梢詠梅集古

風生東閣春來早月滿西園夜未央詠梅集古

李濟

字汝舟廣東新會人諸生有養真堂文稿毓蘭堂詩鈔

家汝舟者績學士也性最孝好讀書言行不苟洵

堪爲後生所矜式

寶硯堂  
文鈔

汝舟先生鄉之善士也少篤學受知於學使彭公以第一名補博士弟子員歲科試屢列前茅以居喪故未食餼李充之進士爲邑中耆儒特重先生學行延課其孫先生事親孝承順無違丁外艱喪具未備將鬻產母意不欲先生卽稱貸以舉之筆

耕以償之畱產以爲祭田其善之見於事親有如此者兩弟身故無子弟婦孀居先生析產爲之贍命子爲之繼其善之見於昆弟有如此者先生訓子以義方課徒以立品受業多知名之士凡建宗祠修族譜立文會或襄以費或任其勞其善之見於行已有如此者交友以敬待人以誠鄉鄰有爭必爲之排難解紛買婢知爲良家子以女育之擇壻嫁之其善之見於接物有如此者

聽松廬文鈔

汝舟子灼光廩生敦品勵學人稱其孝次子洪光

貢生三子捷光業儒

全上

摘句

黃卷千秋業青燈萬古心

夜讀

山雲三徑入秋葉一庭飛

山館

嗟予馬齒頻加長期子龍頭早共昂

勉諸弟子

塵海利名空自苦歡場詩酒本來閒

遺懷

出世才華貴敏捷驚人翰墨在精勤

訓子

旦明白警冰淵惕衾影無慚屋漏嚴

自箴

貧能自立爲高節貴果常謙乃大儒

偶感

范華

字開衡號絳芸江蘇吳縣人廩生有梅花樓稿

摘句

六朝金粉地雙槩木蘭舟

秦淮春泛

程均

字甸邦號夢雷安徽婺源人監生有萬卷樓稿

摘句 白髮他鄉淚黃花故國心

十年猶故我千里尙依人

金城

字竹村江蘇吳縣人諸生有蓀壁山房小草

摘句 醉中身世忘貧賤夢裏親朋雜死生

宣恆

字也慈江蘇長洲人有姑存草

摘句 但覺香從空處得不知春自雪中來

梅花

何其琬

字甯宗號假山廣東香山人附貢生官直隸縣丞  
有假山詩草

先君天懷曠達娛情詩酒所作制藝高華沉實嘗  
自製空心木枕有得意之作卽置其中後卒於直

隸公署木枕與文俱失詩亦罕存

先考事略嗣男  
自蕃謹述

摘句 帝號已除仍大長漢臺新築服中朝

朝漢  
臺

一片沉香明素志千秋廉吏頌遐邦

沉香  
浦

一代江山畱不住落花飛絮各東西

隋隄  
柳

衣香絕勝花香好拾翠何須問姓名

遊春  
詞

何其瑞

字寅宗號桂圃廣東香山人諸生有桂圃詩草

君自幼資質聰穎稍長放達不羈卒年二十五以

弟朝佐貴覃恩貤贈承德郎

松心文鈔

君配李安人旌表節孝以猶子自超為之後

同上

摘句身輕一死浮雲外名重三湘白浪中

漁文

胡地風塵嗟薄命漢宮花月繫離愁

明妃

地有竹林娛靜契會無絃管託清幽

題蘭亭後

南北界分消瘴癘蠻夷臣服震威靈

分茅嶺

春如有夢憑誰覺月豈多情入夜尋

老女吟



廖紀

字子僑廣東嘉應州人諸生有萬樹松齋詩鈔

子僑衣冠古樸直諒多聞余隨侍粵東子僑與余  
讀書玉山草堂賞奇析疑獎善規過資其益良多  
嘗語余曰君性遲疑處事殆必無成余心折其言  
力改故轍自是稍有斷制矣子僑困鄉舉落落寡  
合久爲先大夫記室時余數上公車旣失怙葬畢  
以衣食奔走四方與子僑不復相見及宰江夏子  
僑始來訪余喜而延之賓館居歲餘同赴鞏昌嗣  
余移守蘭州擢本道常畱課諸兒讀三兒亡子僑

乃忽忽不樂與余言淚隨聲下辭歸畱之不可是  
時子僑年已六十行至漢中而病放舟下鄂城歲  
盡不卽行遂卒於鄂不知其子能長守遺編勿散  
佚否集而序之以俟粵賢之采錄又不知異日采  
錄及之否余力所能爲止於是惟子僑知之惟子

僑知之

萬樹松齋詩序  
唐方伯樹義撰

廖君子僑與方伯唐公爲石交君歿唐公求其遺  
詩將梓之屬予加選擇焉始君訪唐公於江夏予  
適在幕中傾蓋若舊識予歲常歸覲君送之曰子  
得承歡幸甚我乃爲鮮民因嗚咽不能止予因有

司君曰勉之終當得第以慰親吾無及矣復嗚咽  
如前久之偕適隴西道中見高山大川必聯轡徘徊  
凝眺邊風蕭條冰雪凌兢則執手殷勤語以良  
食自愛客久意忽忽不樂兩人者酌酒慰勞歌詩  
相酬答不知惻愴之頓釋也予歸君出郭送至數  
十里外霑襟泣下乃別去後客死逆旅予在都踰  
年始知之存歿殊途永無見期今從零章斷句中  
如覲故人顏色也悲夫君於詩喜效長吉玉溪大  
抵麗密婉切善言其性情饑驅轉徙半皆散佚今

錄其可存者得百餘篇

萬樹松齋詩序  
王比部柏心撰

唐子方少時與廖子僑爲友子方性遲疑子僑直言規誠子方感其言力改故轍於是臨事乃有斷制其後子僑歿子方開藩楚北爲序其遺詩猶述良友之言以誌弗諼嗟乎世人多好諛惡直爲友者亦遂不肯直言如子僑之忠告子方之虛受子僑之不愧益友子方之不忘死友皆可以風矣余故爲記之以諭世之取友者

聽松廬  
文鈔

子僑詠春菊句云溫柔福備長生少富貴場兼大隱稀豈徒詠物哉享溫柔之福而又長生處富貴之場而兼大隱自古及今能有幾人耶

聽松廬  
詩話

子僑讀劉孝長漢臯詩有作云芳樹隔烟汀傳來  
事杳冥紅樓三十級銀浦一雙星夜永常歌子詩  
成爲索丁撩儂樺燭下咽淚對娉婷 過蓬萊灘  
長歌中有句云丈夫拔劍出門去人海波濤何敢  
辭況今海氛熾閩粵奸民利涉良民危擬仗防身  
一長劍斬蛟屠鯨剗妖螭早晚功成長揖去海雲  
豁鏡青玻璃前詩悽麗纏綿如聞子夜後詩激昂  
慷慨欲碎唾壺兒女情長風雲氣壯子僑殆欲兼

之

聽松廬詩話

摘句 破碎山河影流離寄託名

凌風樓相傳文信國寓此

根向冷中藏骨格花當疎處倍精神

梅花

漢業烟消悲蜀相蓬萊水淺悵麻姑

秋桑

貪眠我自甘無肉苦讀伊誰鎮以瓜

竹牀

深夜或教煎當酒幾時曾見熱因人

茶竈

孟子道能傳後死長公文已盡先生

韓城

此聯詠韓文公長公文謂蘇長公所撰韓昌黎廟碑

親授鳳毛名早貴

嗣君子方丙子孝廉

陰遺鳩帶世

應隆

晚唐直圃先生

先生官欽州時於刺史堂自書聯云

窮秀才做官不必十分受用大君子救世只憑一片真誠

可知結習難除事修到神仙也好名

羊城五仙

廖時炳

字明熙號鑑湖廣東南海人監生官州同有紅棉江館詩草

先府君生平淡聲色薄滋味無世俗嗜好獨癖於詩自漢魏以及唐宋元明暨

國朝諸家靡不尋流討源務得其精神面目所在而尤根柢於少陵少年角逐吟壇與諸名士擬題分詠府君雖耽吟成癖然未嘗以清談廢事也故張雲巢鹽院棠村太守尤器重之嘗語人曰鑑湖內清外濁聰明藏於渾厚與之言論如飲醇醪令人

自醉庚寅歲家鹿儕叔偕遊京師一時日下名流  
訂車笠贈縞紵而羅羅村侍郎駱簪門中丞尤稱  
莫逆寓都中六年往返遊歷七千里所得詩若干  
首辛丑歲暎夷犯順時承平日久戰具不修有友  
薦府君於當道使董火礮戰艦之役閱三載而告  
成議敘州司馬斯時也軍書旁午羽檄交馳府君  
從容指揮條緒畢具構江天一笠亭爲暇時吟賞  
之地陸居非屋水居非舟得烟波釣徒遺意府君  
厯事既久談言多中鄉族事無大小必諮而後行  
勦辦清海龍吉兩局皆有成效鄉人方倚以爲重



而府君竟以今年正月無疾終於正寢享壽八十

時咸豐七年正月

日也府君生平所爲詩憂

憂獨造晚年涵養醇粹心有所得尤多見道之言

嘗曰鏤章琢句憂玉敲金吾不如諸名士至於說

理沈著感慨雖深而不露劍拔弩張之態吾於諸

子似有微長其自道得力如此

先府君事畧筠謹述

鑑湖州佐有子三人長爲夢生孝廉

松

與余三兒

祥鑑

四姪

祥芝

同己亥鄉榜次爲竹生司馬

筠三

爲

生少尹

浙

鑑翁既歿竹生述其事畧並奉翁

詩稿屬爲選輯余據其所述錄之以當小傳并爲

撰詩話又古體標題近體摘句翁之精神面目亦

可畧見於斯矣

聽松廬詩話

鑑湖秋懷詩云撼地機聲沸佛郎鄉人激憤事戎  
行移家力到三遷竭守望心經百鍊剛粒米如珠  
憂市小東薪爲炬苦更長年來一似防邊客兩鬢  
皤皤夜染霜甲寅丙辰兩遭兵火遷徙力竭守望  
身勞衆人苦况鑑湖一詩道出

同上

鑑翁詠蚊云入幕公然刺客來刺客二字誓切

同上

標題 雜詩 讀史 白雲洞對月

以上五古

江村

玩月

高郵

以上七古

摘句

吾甯任坦率磊落見真性

醉言

此二句鑑湖詩如是人亦如是

聽松廬詩話

既欺罔千古復籠絡時彥

讀史

此十字寫出古來奸雄心事

同上

可知口腹累佛亦難言高

雜詩

臣朔飢欲死不害乎爲仙

憂患

佛亦須食仙曾忍飢仙佛亦人耳

同上

一片冰壺心飛出七十峯恍如芙蓉城都

在水精宮

白雲洞對月

四句奇思異采大有太白神氣

同上

灘飛惶恐水臺散鬱孤煙

十八灘

人投羈旅宿月在異鄉圓

玉山旅夜

月在異鄉圓五字警與老杜月是故鄉

明句可對照可並傳

聽松廬詩話

人煙三里地夜籟百般秋

宿台兒庄

與唐人千聲各爲秋句均有妙緒

同上

晚食得安步牛歸帶牧童

村晚

較唐人牧童驅犢返句更有生趣

同上

水國樓臺金粟影花天絃管玉人歌

泛月珠江

金燈照地佛千手銅鼓催春花百城

木棉

林國粉

字豐園廣東連平人增生有浮山草堂詩鈔

君少時卽以古學受知顧耕石先生

元熙

嘆爲奇

才生平淡於榮利不樂仕進天性純孝奉母家居  
足不出鄉閭嘗謂人曰是亦爲政萊衣奚必讓袞  
衣乎終日手一編無倦容上自經史以至諸子百  
家金石碑版文字必窮究其所以然君於詩古文  
詞俱探索有得尤好吟詠其浸淫於古也溯源漢  
魏迄於 國朝諸大家靡不入其室而窮其奧蓋  
其心摹手追漸摩寢饋者數十年於茲矣假使君

出其才與斯世相角將見本詩書爲經濟其抱負  
必有異人者乃不屑此而娛情色養酣詠薜蘿此  
其志豈時流所能及哉君生於乾隆庚戌卒於道  
光乙未年四十六所著有浮山草堂詩八卷文四  
卷賦一卷試帖四卷歷代詩文正宗三十二卷嶺  
南詩鈔十六卷

林明經墓誌  
顏大令爾弼撰

林豐園東郊晚步詩云雙峯秋雨後林下一僧歸  
我亦看山罷相逢話落暉簾鉤臨水別草路入松  
微却望前溪寺蒼蒼橫夕霏通體氣格逼近唐人  
置之唐賢三昧集中幾不可辨

聽松廬  
詩話

昔人以孫權爲英雄曹操爲奸雄  
先主爲梟雄余謂不然權甘心稱臣  
於魏何得爲英雄當以先主爲英雄  
權爲梟雄林豐園詠史有云背劉臣  
魏成

何事莫羨生兒似仲謀論極透快

聽松廬詩話

摘句

雖然吾亦愛未免士而懷

一詠齋落成

世味酸鹹別家風淡泊宜

謝人送白菜

昨夜月明知有雪隔年春早又看花

冬曉看梅

片言便遣交周勃匹馬曾經下尉佗

陸賈

畢竟叱咤同救郭周宗唐祀兩能延

魯仲連李

青蓮

以叱咤同救郭汾陽兩事並論未經人道聽松廬詩話

榮名不在登科記恨事空懷討賊心

羅隱

英雄事去空淘浪偏霸時來亦借風

赤壁懷古

蕭蕭落木江天迴秋在高樓一笛中

黃鶴樓圖

兼教潘子栽花地都仿張公秀麥畦

贈羅月川

三月花開辭故國一帆風送入中原

送友人遊

河南

沿溪但愛石磊落穿樹不知林淺深

石澗道中

雲開瀑影有時見風送野香無處尋

同上

何處酒樓人對語一燈紅出綠楊梢

夜泊

殘宵酒盡客歸去滿地月明秋可憐

秋夕



林君豐園詩余已選入徵畧二編矣丁巳秋令子  
璿臺廣文來省垣復以君遺草一卷見示璿臺於  
先人詩草雖零章斷句必謹藏以俟表揚可謂孝  
思不匱矣因擇其佳者續錄之

聽松廬  
詩話

豐園新歲感懷詩云舊歲逢新歲承歡得侍隨如  
何今夕酒不共老親持寂寂筵虛設茫茫恨孰知  
有懷同不寐兄弟各淒其四十字至性至情是墨

是淚

同上

摘句

鳥帶雲歸樹人隨月到門

暮過鄰家

翠羽叫殘月梅花明半村

梅花村

落花詩前人名作不少矣林豐園能別出心裁纏

綿悱惻茲錄數聯於左每當春事將闌綠肥紅瘦

微吟一過令人如聞子夜輒喚奈何

聽松廬詩話

春風有約歸三月夜雨無情送五更

落花

富貴易成今昔夢文章難寫別離情

非無結子成陰日亦有拖泥帶水時

前路山應名大別故園花尙剩將離

繫住除非紅線手飄來疑是綠珠魂

凌風更作驚鴻影帶雨翻成墮馬妝

歸去尙疑天別有再來誰料路都無

西北漏天無石補東南巢木有人居

丁丑大水

舊事來如秋有約遠書慳似筆無能

夜坐

辭巢燕去畱殘壘踏雪鴻歸認爪痕

舊讀書處

大地似棋平布局衆山如馬各分槽

大科峯

萬綠有天歸淨土一窩從古號銷金

西湖

舟楫喚殘遊子夢英雄淘盡大江聲

鎮江

二分明月珠簾夜廿四虹橋玉笛秋

揚州

南國秋聲兼雁下北條山色抱關來

燕臺登高

霸國力能憑子弟酒杯情不殺英雄

楚霸王墓

孺子教將能忍後素書藏在未燒前

黃石公祠

烏孫死去知何所蔡媛生還亦委塵

明妃塚

將蔡文姬一托尤覺昭君可貴

聽松廬詩話

樹石有天猿不老溪山無主寺飛來

飛來寺

三秋偶趁黃花約一雨來催白社詩

海幢寺餐

菊值

雨

三百六旬餘此夕百千萬事在分陰

除夕

兵無定律農堪將人到同仇士亦雄

乙卯書事

明鏡自疲因屢照餘膏無幾漫多煎

遣老

寄遠書應無復作送窮文亦不須靈

驢背詩情應有我水邊林下忽逢君

白雲探梅